

## SEGUNDA DE SAN JUAN

### Apostol Juanpa Ishcaycag Cartan

Cay ishchaycag San Juanpa cartanga, puntacag cartanpitaga ichic jucläyacarpis, puntata gellgangannöllum.

Tsaymi cay cartata gellgarnin mana shumag esplicacurlla quiquinpag nirgan: “Auquinyäcushga” nir. Cay cartataga juc marcapa shutinmannömi apatsirgan. Pero tsay marca maychö canganpis manam esplicacurnin musyatsicuntsu.

Cay libruchömi ichiclla gellgarnin yachatsicun, shumag jucnin jucninwan cuyanacunapag. Tsaynöllam musyatsicun llutan mana alli yachatsicugcunata mana cäsurnin Señor Jesucristoman mas firmi criyicunapag, puntacag cartanchö musyatsicungannölla. Tsaycunapag mas musyanayquipag liyinqi Juanpa puntacag cartanpa esplicacuyininta.

Cay cartam willacun tsay apatsingan marcaman sasllana aywananpag.

---

#### Rasumpacagwan alli cuyanacuy

<sup>1</sup>Noga auquinmi, Dios Yaya acranan criyicug señorawan wamrancunaman cay cartata gellgamü. Cay cartataga gellgamü llapan shongöwan alläpa cuyayarniquim, manam nogallatsu tsaynö cuyayag sinöga llapan rasumpacagta regernin musyagcunapis alläpam cuyayäshunqui.

<sup>2</sup>Tsaynöga gamcunata cuyayag shongontsicchö rasumpacagllata regengantsicpitam. Tsay rasumpa regengantsicga nogantsicchömi imayagpis caycanga. <sup>3</sup>Dios Yayapawan Tsurin Señor Jesucristopa bendicunnincunatawan llaquipäcuyininta, shumag alli päsaucuyininta y rasumpacag cuyacuyininta gamcunaman churaycayällämutsun.

<sup>4</sup>Alläpam cushicurgä waquincag wamrayquicuna Dios Yayapa

mandamangantsicnölla rasumpacagcunallachö caycayanganta musyasquir. <sup>5</sup>Cananga alläpa cuyashga señora, alläpam rugayag llapantsic jucnin jucninwanpis shumag cuyanacunapag. Cay gellgamungäga manam juc mushog mandamientutsu, sinöga gallanapita chasquingantsicllam. <sup>6</sup>¿Tsaypunga imanötan cuyanacushunga? Cawacushun Dios Yayapa mandacuyinincunata shumag cäsucurnin. ¿Imatan Dios Yayapa mandacuyninga? Dios Yayapa mandacuyninga shumag cuyanacur, cawacungantsicmi gallanapita chasquingantsicnölla.

#### Llullarcurnin engañacur Señor Jesucristopa contran puriyan

<sup>7</sup>Atscagmi llullacur engañacugcuna cay patsachö puriyäyan. Manam paycunaga

criyiyantsu Señor Jesucristo nogantsicnō runa shamunganta. Tsaynō mana criyirnin purigcunaga Señor Jesucristopa contran llullacurnin parlamgi caycāyan. <sup>8</sup>Tsaymi quiquiquicuna cuidādu cayānayqui, llapan alli ruray yachacuyangayquita mana ni imaypis dējamin gongayānayquipag. Tsaynō cuidacurmi Dios Yayapita rasumpacag alli premiuta chasquiyanqui.

<sup>9</sup>Pipis allāpa yachagtucurnin Señor Jesucristopa yachatsicuyninta mana sīgirga, manam Dios Yayawantsu cawaycan. Pero Señor Jesucristopa yachatsicuyninta rasumpa yachatsicugcagmi sīga, Dios Yayawan y Tsurin Señor Jesucristowan imaypis cawacuycāyan. <sup>10</sup>Si pipis gamcunaman shamuycurnin, juclāyapanō yachatsiyāshuyniquita munaptinga, ama

wajiquicunamanpis chasquiyanquitsu ni saludayanquitsu. <sup>11</sup>Tsaynō yachatsicugta saludarnin wajinman chasquiig runaga, paynō mana alli ruragmanmi ticinga.

#### **Juanpa ushanancag palabran**

<sup>12</sup>Mas atscaragmi can cay cartachō gellgamunāpag, pero manach cartallachōga llapanta niyagmansu. Mas bienmi, visitacug shamuyta munaycā cāra cāra tincusquir shumag parlapāyarniqui llapantsic cushicusquinapag.

<sup>13</sup>Dios Yaya acrangan criyicug señora ñañayquipa wamrancunam, paycunatapis quiquin Dios Yaya acrashga captin salūduyqui apatsicayāmun.

Tsaynō callātsun.